

Il provediment da sanadad duai vegnir unifitgà

La procedura da consultaziun davart la revisiun parziala da la lescha da la tgira da malauns è terminada

DA MARTIN CABALZAR

■ **A l'ocasiun da l'inscunter mensil da la regenza cun ils meds da massa ha cusseglier guvernativ Peter Peyer, il schef dal departament da giustia, segirezza e sanadad, infurmà davart ils resultats da la procedura da consultaziun per la revisiun parziala da la lescha chantunala da la tgira da malsauns.** Sco quai che cusseglier guvernativ Peter Peyer (ps) ha accentuà vegnia il niz d'in provediment da sanadad unifitgà da principi renconuschì da tut las regiuns da provediment. Refusadas cleramain vegnian dentant la via proponida da crear regiuns da provediment da sanadad sco era las directivas previdas per l'organisaziun da questas regiuns da provediment.

Consultaziun è fruntada sin grond interess

La revisiun da la revisiun parziala da la lescha numnada saja fruntada sin ordvart grond interess, accentuescha il schef dal departament Peter Peyer. Tut en tut èn vegnidas inoltradas berg main che 136 posiziuns fin l'ultim termin dals 30 d'avrigl 2019. Intgins participants da la consultaziun sajan s'exprimids a moda detagliada davart las dumondas en discussiun. Da las 136 posiziuns derivan 60 da las vischnancas, otg da las regiuns, 48 instituziuns da sanadad – che cumpiglian organisaziuns da spitex sco era chasas da vegls e tgira u spitals – sco era 13 uniuns u associaziuns. Plinavant han era quatter participants nizzegia la pussaivladad da prender posiziun.

Furmaziun da regiuns da provediment

En il center da la revisiun previda stat la furmaziun da regiuns da provediment. Quel punct è lura era vegnì sustegnì da la gronda part dals pertutgads ch'han



In bun exempel per la buna cooperaziun tranter las instituziuns dal provediment da sanadad è l'Engiadina Bassa cun spital, spitex e dimora da vegls e tgira a Scuol.

MAD

prendì posiziun en il rom da la procedura da consultaziun. Il niz d'ina planisaziun da sanadad unifitgada sin l'entir chantun è vegnì renconuschì da la gronda maiortad da las instituziuns pledentadas. Fertant che la furmaziun da regiuns da provediment sco tala è nundisputaivla, chaschuna la repartiziun concreta da questas regiuns per bleras reacziuns criticas, sco quai che Peyer è s'exprimi envers La Quotidiana. Uschia è vegnì postulà che las regiuns da provediment duessan correspunder a las regiuns politicas. Plinavant saja vegnì renconuschì che la planisaziun unifitgada

da las regiuns da provediment da sanadad levgieschia la cooperaziun tranter tut ils purschiders da prestaziuns e servetschs da sanadad e saja uschia in emprim ed impurtant pass per la finala facilitar in provediment integral per scadin regiun.

Provediment integral duai succeder sin basa voluntaria

Tenor il tenor da las posiziuns inoltradas duai quest pass en direcziun d'in provediment da sanadad en las regiuns dentant succeder a moda voluntaria. Las regiuns duain obtegnair la pussaivladad da

decider en atgna cumpetenza tant en tge dimensiun sco er en tge furma questa cooperaziun da las differentas instituziuns engaschadas sin il champ da la sanadad duain succeder. «Las propostas fatgas dal chantun ch'èn vegnidas formuladas en il sboz da consultaziun vegnan refusadas vehementamain dals consultads», accentuescha Peyer. L'obligaziun da las vischnancas e da las singulas regiuns da provediment da crear per quest intent ina nova fundaziun che surpigliass tant la direcziun operativa sco strategica dals menaschis da sanadad en la regiun è consequentamain vegnida refusada catego-

ricamain. Crititgà han ins cunzunt il fatg che la nova fundaziun saja in'instituziun supplementara betg necessaria cun in chau surordinà fitg cumplitgà che saja collià cun auts custs. Consequentamain vegnan era las stipulaziuns previdas en il sboz pertutgant las incumbensas e cumpetenzas minimalas da la fundaziun, ils organs da la fundaziun ed il profil e la cumposiziun da la suprastanza s'inclegia era fruntads sin opposiziun. Medemamain refusada vegn la proposta da crear stimulsiun finanzials per la surdada da la direcziun strategica ed operativa a la nova fundaziun.

Dapli sustegn finanziel dal chantun

En il medem mument han singulas regiuns da provediment pretendì ch'il chantun prestia per il project da la furmaziun da regiuns da provediment in'extensiun da las pussaivladads da conceder contribuziuns. Uschia vegn tranter auter proponì d'augmentar la contribuziun imputabla maximala per il chantun sin 100 pertschient.

Ulteriur proceder

Tenor il schef dal departament da giustia, segirezza e sanadad Peyer vegn la regenza uss ad examinar sin fundament dals resultats da la consultaziun l'ulteriur proceder. Ses departament haja gia decidì da laschar elavurar in parairi che duai sclerir cunzunt la rentabilitad dals centers da provediment integrals. Cun quai vul ins dar suatientscha a la critica exprimida da pliras instituziuns ch'han crititgà ch'i manchia l'argumentaziun per la necessitad d'agir sin il sector da las organisaziuns engaschadas actualmain sin il sector dal provediment da sanadad public. Quest giudicat duai er eruir concretamain ils custs che pon vegnir spargnads en connex cun la creaziun da centers da sanadad en las regiuns.